

PATRIOT

BULETIN KEMENTERIAN PERTAHANAN

ISSN 1511-1849 BIL : 2/2011

PERCUMA

Platun



Kandungan



P LATUN SENI BAKAL BERI SEMANGAT	2
S ITI KETUA PLATUN WATANIAH SELEBRITI	3
M AJLIS PERLANCARAN RAYUAN HARI PAHLAWAN (RHP) 2011	4
M AJLIS SAMBUTAN 10 TAHUN JHEV	7
M AJLIS PELANCARAN WAKAF AL-QURAN	8
L AWATAN KE CHINA PRESS	9
3G (GEMUK, GEMPAL, GEBU) • 3G (GENIT, GAYA & GEMILANG)	10
M AJLIS BUNGKUSAN SUMBANGAN HARI RAYA	11
P ELAKSANAAN PROGRAM PENDIDIKAN KESIHATAN REPRODUKTIF DAN SOSIAL (PKRS) •	12
D IIALOG BERSAMA PRESIDEN CUEPACS	14
J ASAMU DIKENANG	15
A .P.C PEKERJA MEREALISASIKAN TRANSFORMASI NEGARA	16
K ARNIVAL 1MINDEF SASAR BUKAN BUMIPUTERA DI SANDAKAN	17
L AWATAN PEMANTAUAN PROGRAM KESIHATAN BAKAT ATM	20
L AWATAN KE RUMAH PEMENANG ANUGERAH IBU MITHALI 2010	21
P ENUKARAN PUCUK PIMPINAN BAKAT ATM	22
P ANTAI AIR PAPAN JADI SAKSI PENUTUP KURSUS ASAS KOMANDO SIRI 1/2011	24
A IRFORCE-NEXT GENERATION	26
P ERKONGSIAN STRATEGIK TLDM TERUS MENYERLAH DI PERSADA ANTARABANGSA ...	27
5s	30
P ERTUKARAN PUCUK PIMPINAN ATM	34



Dari Meja Editor

Bersyukur kerana keluaran kali ini berjaya diterbitkan seperti biasa. Keluaran kali ini lebih kepada program Askar Wataniah yang kini menjadi bualan masyarakat. Ternyata program ini mendapat sambutan yang menggalakkan dari masyarakat luar, mana tidaknya golongan selebriti tempatan yang popular sudi menjadi ikon kepada program ini. Penglibatan khas Datuk Siti Nurhaliza Tarudin dilihat sebagai satu langkah mempromosikan lagi Askar Wataniah kepada semua masyarakat luar.

Melihat kepada sejarah penubuhan Askar Wataniah yang dilancarkan secara rasminya oleh Y.B. Dato' Seri Ahmad Zahid bin Hamidi, Menteri Pertahanan Malaysia pada 26 Jun 2009, ketika itu semua warga MinDef diarah untuk menyertai program ini. Semua itu terbukti mendapat sokongan bila warga MinDef menjalani pemeriksaan kesihatan beramai-ramai sebelum layak mengikuti program ini. Diharap dengan adanya sokongan selebriti tempatan akan lebih memberikan kesedaran akan tanggungjawab kita sebagai rakyat Malaysia untuk mempertahankan negara selari dengan objektif penubuhan Askar Wataniah sebagai benteng kedua di dalam mempertahankan negara sekaligus sebagai sumbangan murni kita kepada negara.

Sepanjang pertengahan tahun ini juga, Kementerian Pertahanan khususnya dan Angkatan Tentera Malaysia amnya telah menerima Panglima Angkatan Tentera yang baru iaitu Jeneral Tan Sri Dato' Sri Zulkifeli bin Mohd Zin yang menggantikan Jeneral Tan Sri Dato' Sri Azizan bin Ariffin yang bersara pada 16 Jun 2011. Semoga pertukaran pucuk pimpinan Angkatan Tentera Malaysia dilihat sebagai satu kesinambungan tugas-tugas murni dalam mempertahankan negara sekaligus mengukuhkan ikatan bersama warga awam di Kementerian yang telah terjalin sekian lama.

Setelah sebulan berpuasa maka tibalah hari yang ditunggu-tunggu. Sambutan Hari Raya Aidilfitri akan meriah hendaknya dan tahun ini memberikan seribu kemanisan dalam kebahagiaan.

Bunyi Mercun bertalu-talu

Tanda ia datang lagi

Ramadhan berlalu Syawal Bertamu

Mesra Kasih Di Aidilfitri



Sidang Redaksi

PENAUNG

Y.Bhg Dato' Dr. Haji Ismail bin Haji Ahmad
Ketua Setiausaha
Kementerian Pertahanan Malaysia

PENASIHAT

Y.Bhg Dato' Haji Ismail bin Ibrahim
Timbalan Ketua Setiausaha (Pengurusan)
Kementerian Pertahanan Malaysia

KETUA PENGARANG

Razman Hakimi bin Abdullah

EDITOR

Nazrie bin Saini

WARTAWAN

Mej Suria binti Sulaiman
Mej Abd Rais bin Esa
Lt Kdr Rahimah binti Taib TLDM
Mej Marina binti Harun TUDM

PENULIS TAMU

Lt Kol Esah binti Sulaiman
Mej Setia Perwira bin Mohd Wazir
Faridah Hanim binti Abd. Ghani
Mohd Yusrizal bin Ab. Razak
Lt Siti Aishah binti Noor

FOTO

Sel Liputan, Seksyen Hal Ehwal Korporat &
Sel Rujukan dan Penerbitan, Seksyen Pentadbiran
Korporat

TERBITAN DAN EDARAN

Unit Komunikasi Korporat
Kementerian Pertahanan Malaysia

Sidang Redaksi Buletin PATRIOT mengalu-alukan sumbangan artikel mengenai aktiviti Kementerian, Jabatan dan Agensi dibawahnya. Artikel hendaklah dihantar kepada:

EDITOR

Buletin PATRIOT
Unit Komunikasi Korporat
Kementerian Pertahanan Malaysia
Jalan Padang Tembak
50634 Kuala Lumpur

Tel : 03-2071 4008

E-mel : nazrie@mod.gov.my

PLATUN SENI BAKAL BERI SEMANGAT

Artikel : Mej Marina Hj Harun TUDM Foto : Kpl. Shahrulhazar bin Azizan


Sebahagian daripada artis tempatan yang menyertai Rejimen Askar Wataniah atau Pasukan Simpanan Tentera Darat di bawah Platun Seni mula menjalani latihan kawad dan menembak menggunakan senjata Colt M-16 pada 4 Julai lepas di Padang Kawad Rejimen 515 Askar Wataniah, Kuala Lumpur.

Kewujudan Platun Seni ini diharapkan dapat memberi contoh dan menarik minat warga Malaysia dengan tugas atau karier sebagai tentera terutama di kalangan masyarakat Cina dan India untuk sama-sama menyertai Angkatan Tentera Malaysia mahupun Rejimen Askar Wataniah.

Menteri Pertahanan, Datuk Seri Dr. Ahmad Zahid Hamidi bersama Panglima Angkatan Tentera dan Panglima panglima Perkhidmatan menyaksikan latihan tersebut.

Menurut Menteri Pertahanan, Platun Seni ini akan dibawa ke semua kem Tentera Darat, TLDM dan TUDM. ATM juga akan memberikan keahlian Kehormat kepada penerbit dan pengarah filem, Datuk Yusof Haslam serta ahli perniagaan, Datuk Seri Khalid Mohd Jiwa iaitu suami kepada Datuk Siti Nurhaliza ke dalam Rejimen AW, yang mana turut hadir semasa latihan tersebut berlangsung.

Seramai 22 orang artis menjalani latihan ketenteraan pada hari tersebut termasuklah Datuk Siti Nurhaliza dan Lisa Surihani.





Siti

KETUA PLATUN WATANIAH SELEBRITI

Artikel : Nazrie bin Saini Foto : Kpl. Shahrulhazar bin Azizan

Penyanyi terkenal Datuk Siti Nurhaliza Taruddin teruja dilantik sebagai Ketua Platun Wataniah Selebriti dalam Rejimen Askar Wataniah selepas menyerahkan borang keanggotaan kepada Menteri Pertahanan Malaysia, Datuk Seri Dr Ahmad Zahid bin Hamidi. Dorongan suami tersayang, Datuk Seri Khalid Muhd Jiwa menambahkan lagi semangat dimana Siti dan rakan artis lain akan menjalani latihan selama 39 jam. Penyanyi tersohor ini menyifatkan keanggotaan beliau di dalam Askar Wataniah sebagai pencetus kepada belia dan wanita negara ini berlatih mempertahankan negara. Selain menyemarakkan lagi semangat mempertahankan negara, diharap memberi pendedahan secukupnya dalam bidang ketenteraan walaupun beliau pernah bercita-cita menjadi anggota polis.

Selain Siti, Bintang Paling Popular Anugerah Bintang Popular Berita Harian (ABPBH) 2010, Shaheizy Sam bersama pemenang Anugerah Juara Lagu 2010, Ana Raffali, Penerbit Filem terkenal, David Teo, pelakon, Intan Ladyana

dan Mohd Noor Bon serta artis rakaman Aizat Amdan antara selebriti yang hadir dan bersama-sama Siti menyerahkan borang keanggotaan sebagai Askar Wataniah. Sementara itu, anak perempuan Menteri Pertahanan, Nurul Hidayah yang pernah merakamkan album antara yang kelihatan pada majlis tersebut.

Sepanjang majlis diadakan, semua selebriti diberikan sepasang pakaian seragam Askar Wataniah sebagai simbolik penyertaan. Diharap dengan adanya penyertaan selebriti mampu mencapai matlamat Kementerian bagi memberikan pendedahan mengenai aktiviti, latihan dan tugas Angkatan Tentera Malaysia (ATM) di samping menarik perhatian golongan muda bagi menyertai program tersebut.

"Sama-Samalah Kita Sertai Askar Wataniah"



MAJLIS PERLANCARAN RAYUAN HARI PAHLAWAN (RHP) 2011

Artikel : Mohd Yusrizal bin Abd. Razak Foto : Megat Mohd Firdaus bin Megat Ahmad

Isteri Perdana Menteri, Yang Amat Berbahagia Datin Paduka Seri Rosmah Mansor, selaku Penaung RHP telah merasmikan Pelancaran RHP 2011 di Amfiteater Seri Utama, Kompleks Kraf Kuala Lumpur, Seksyen 63, Jalan Conlay, Kuala Lumpur pada 29 Julai 2011.

Tempoh Kutipan RHP 2011 adalah mulai 15 Julai hingga 15 Oktober 2011. Pada pelancaran ini, secara rasminya rakyat Malaysia boleh turut serta dalam menghargai pahlawan-pahlawan negara yang telah menyumbangkan bakti kepada negara dengan menghulurkan sumbangan kepada Tabung RHP 2011. Setiap penderma akan diberikan sekuntum Bunga Raya sebagai simbol RHP ini dan ianya digalakkan dipakai sepanjang tempoh kutipan dilaksanakan.

Tema bagi Kempen Rayuan Hari Pahlawan 2011 ialah 'Negara Gemilang, Pahlawan Dikenang'.

Sumbangan boleh dibuat kepada akaun Tabung RHP bernombor 10-595-000-320-1 (Affin Bank) melalui wakil-wakil daripada Jabatan Hal Ehwal Veteran ATM (JHEV) di seluruh negara serta Persatuan Bekas Tentera Malaysia (PBTM) yang akan turun ke jalanan dalam menjayakan kutipan ini.

Masyarakat boleh menderma melalui khidmat pesanan ringkas (SMS) dengan taip RHP (1/2/3/4/5/6/7/8/9/10) dan hantar ke 37799. Angkat 1 hingga 10 ini mewakili nilai ringgit yang mahu disumbangkan.





PUBLISITI DI MEDIA ELEKTRONIK PROGRAM SELAMAT PAGI MALAYSIA TERBITAN RTM Pada 3 Ogos 2011,
 terbitan RTM TV1, telah mewawancara Ketua Pengarah JHEV mengenai Rayuan Hari Pahlawan 2011.





ISTIADAT SAMBUTAN HARI PAHLAWAN 2011 Seramai 23 orang kakitangan JHEV telah membuat Kutipan Jalanan RHP 2011 di Dataran Merdeka, Kuala Lumpur sempena Istiadat Sambutan Hari Pahlawan 2011 pada 31 Julai 2011.



MAJLIS PERHIMPUNAN BULANAN MINDEF BAGI BULAN OGOS pada 2 Ogos 2011 telah dihadiri oleh Menteri Pertahanan, pegawai dan kakitangan JHEV telah mengadakan kutipan bagi RHP 2011.



MAJLIS SAMBUTAN 10 TAHUN JHEV

Artikel & Foto : Mohd Yusrizal bin Abd. Razak

Menteri Pertahanan, YB Dato' Seri Dr. Ahmad Zahid bin Hamidi telah merasmikan Majlis Sambutan 10 Tahun Jabatan Hal Ehwal Veteran ATM (JHEV) di Auditorium Wisma Pertahanan, Kementerian Pertahanan, Jalan Padang Tembak, Kuala Lumpur pada 24 Mei 2011.

Pada majlis ini, Menteri Pertahanan telah melancarkan Buletin Khas Veteran ATM sempena 10 tahun penubuhan JHEV.

JHEV ialah sebuah Jabatan di bawah naungan Kementerian Pertahanan dan diwujudkan bagi membela Veteran ATM dan tanggungannya. Kerajaan telah membelanjakan tidak kurang dari RM200 juta bagi membantu 105,000 ahli Veteran ATM yang telah berdaftar di bawah JHEV bagi tempoh sepuluh tahun sejak 2001. Jenis-jenis Skim Bantuan Kebajikan JHEV ialah Bantuan Perubatan, Peralatan Sokongan Perubatan, Bantuan Persekolahan, Bantuan Sara Hidup, dan Bantuan Kemasukan IPTA/ Politeknik.

Turut hadir pada majlis tersebut ialah Timbalan Menteri Pertahanan, YB Datuk Dr. Haji Abd Latiff Bin Ahmad, Panglima Angkatan Tentera (PAT) Malaysia, Jeneral Tan Sri Dato' Sri Zulkifeli bin Mohd Zin, Timbalan Ketua Setiausaha (Dasar) Kementerian Pertahanan, Dato' Dr. Ismail bin Hj Bakar, Mantan-Mantan PAT iaitu Jen Tan Sri Dato' Mohd Ghazali bin Dato' Mohd Seth, Jen Tan Sri Yaacob bin Mohd Zain dan Tan Sri Abd Rahman bin Abd Hamid (Bersara) dan Ketua Pengarah (KP) JHEV, Mej Jen Dato' Zulkiflee bin Mazlan.

Pada majlis yang sama, ia juga turut dihadiri oleh Mantan KP JHEV Yang Pertama, Mej Jen Dato' Mohd. Amin bin Md Saleh (Bersara), Mantan KP yang Kedua, Mej Jen Dato' Hashim bin Yahya (Bersara), Mantan KP Yang Ketiga, Mej Jen Dato' Zulkiple bin Kassim, Mantan-Mantan Timbalan Ketua Pengarah JHEV iaitu Dato' Hj. Abdul Hadi bin Awang Kechil, Hj. Lokman bin Muda dan Encik Zulkifli bin Yahya serta semua Presiden Persatuan/ Kelab/ Bekas Tentera Malaysia.



MAJLIS PELANCARAN WAKAF AL-QURAN

Artikel : Faridah Hanim binti Abd. Ghani Foto : Megat Mohd Firdaus bin Megat Ahmad

Sabda Rasulullah S.A.W:

"Sedekah tidak akan mengurangi harta. Tidaklah ALLAH-Azwa Wa Jalla-tambahkan bagi seorang hamba yang suka memaafkan melainkan kemuliaan, dan tidaklah seorang suka memaafkan melainkan kemuliaan, dan tidaklah seorang bersikap tawaduk terhadap orang lain kerana ALLAH-Azwa Wa Jalla melainkan ALLAH Ta'ala akan meninggikan darjatnya" (Riwayat Muslim).

Sedekah adalah satu pemberian ikhlas tanpa mengharapkan sebarang pembalasan dari penerimanya. Pahala sedekah boleh menghapuskan kesalahan seperti air memadamkan api. Oleh itu, sedekah perlulah lahir dari hati yang ikhlas tanpa mengharapkan sebarang balasan. Bagi memastikan amalan sedekah kita tidak sia-sia maka Islam telah mengajarkan umatnya menyumbang dan bersedekah menepati erti "sedekah" yang sebenar seperti yang digariskan oleh syarak.

Pada 11 Julai 2011, Yayasan Restu, Kompleks Seni Islam Selangor telah mengadakan Majlis Pelancaran Dana Wakaf yang dirasmikan oleh Menteri Pertahanan. Majlis ini adalah hasil kerjasama erat antara Yayasan Restu, Kementerian Pertahanan dan Kor Agama Angkatan Tentera

bagi mengumpul dana untuk mengembangkan penggunaan Al-Quran dan terjemahannya mengikut beberapa bahasa penduduk dunia terutama di negara yang mana umat Islam menjadi minoriti. Usaha yang diselaraskan menerusi Kor Agama Angkatan Tentera (KAGAT) dan Yayasan Restu ini akan membabitkan penghasilan naskhah Al-Quran dan terjemahan ke dalam bahasa Khmar di Kemoja, Mandarin dan Russia.

Selain itu, Yayasan Restu juga telah menganjurkan pelbagai program demi untuk membudayakan Al-Quran dan As-Sunnah dari 8 hingga 17 Julai 2011 yang terbuka untuk kunjungan semua. Antara program pengisian yang telah dilaksanakan sepanjang festival ini ialah Pameran Pedang Rasulullah SAW dan Sahabat R.A, Pameran "Kenali dan Cintai Rasulullah SAW, Alami Suasana Kediaman Baginda", Pameran dan Pertandingan Kaligrafi dan Seni Khat Kebangsaan, ceramah dan forum serta beberapa program lain yang banyak memberikan manfaat kepada semua yang hadir.

Secara keseluruhan program yang dianjurkan ini mampu meningkatkan lagi penghayatan umat Islam kepada ajaran Al-Quran yang sebenar di samping menyediakan pelaburan kepada kita untuk perjalanan di akhirat sana.





LAWATAN KE CHINA PRESS

Artikel : Nazrie bin Saini Foto : Megat Mohd Firdaus bin Megat Ahmad

Menteri Pertahanan, Datuk Seri Dr Ahmad Zahid Hamidi telah melakukan lawatan kerja ke Syarikat Penerbitan Akhbar Harian China Press. Turut mengiringi lawatan ini Panglima Angkatan Tentera, Jen Tan Sri Dato' Sri Zulkifeli Mohd Zin, Panglima Tentera Darat, Jen Datuk Hj Zulkifli Hj Zainal Abidin, Panglima Tentera Udara, Jen Tan Sri Rodzali Daud, Panglima Angkatan Bersama, Laksamana Madya Datuk Ahmad Kamarulzaman Hj Ahmad Badaruddin dan Pegawai-pegawai Kanan ATM.

Pada lawatan ini rombongan Menteri Pertahanan dibawa melawat ke pejabat-pejabat dan diperkenalkan pada staf-staf Akhbar China Press. Diakhir lawatan telah diadakan sesi dialog bersama Ketua Editor, En Teoh Yang Khoon serta wartawan China Press dan diakhir dengan pertukaran cenderahati.



3G (GEMUK, GEMPAL, GEBU)

3G (GENIT, GAYA & GEMILANG)

Artikel & Foto : L.t Kol Esah binti Sulaiman (BAKAT ATM)

Program 3G ke 3G BAKAT ATM yang masuk tahun ke 3 telah disempurnakan penutupannya oleh Pengerusi Jemaah Tertinggi BAKAT ATM, Puan Sri Datin Sri Umi Kalsom bte Wan Awang pada 25 Jul 2011 bertempat di Gambang Resort City, Kuantan, Pahang. Program yang bermula pada 1 Feb 2011 telah disertai oleh 75 Ahli BAKAT dari Perkhidmatan Darat, Laut dan Udara di Kawasan Kuantan sementara 10 Ahli BAKAT Gabungan yang bertempat di KEMENTAH. Pada akhir program, seramai 63 peserta telah berjaya menamatkan program. Walaubagaimanapun hanya 15 peserta terbaik dari setiap Perkhidmatan kecuali BAKAT Gabungan diambil kira untuk mendapatkan pemenang.

Program ini adalah salah satu aktiviti tahunan BAKAT di mana ianya bertujuan untuk menggalakan Ahli-Ahli BAKAT agar sentiasa menjaga kesihatan bukan sahaja untuk diri sendiri tetapi juga untuk keluarga. Di sepanjang program dilaksanakan ianya telah mendapat kerjasama Bahagian Perkhidmatan Kesihatan ATM yang telah menyediakan Pakar-Pakar dalam bidang senaman, pemakanan dan pemeriksaan kesihatan. Bagi memantapkan lagi program, sesi motivasi bersama Pegawai Motivasi juga diadakan bagi memberi semangat kepada peserta-peserta. Perkhidmatan juga telah menyediakan Jurulatih Jasmani yang berpengalaman bagi membantu peserta melaksanakan aktiviti senaman dengan cara yang betul dan berkala.

Di dalam ucapan penutupnya, Pengerusi Jemaah Tertinggi BAKAT ATM telah melahirkan rasa bangga di atas komitmen semua pihak terutama para peserta yang sentiasa mematuhi dan mengikuti panduan yang diberikan oleh pakar-pakar dan mereka yang terlibat dalam mengawasi program ini. Ucapan tahniah juga diberikan kepada para peserta kerana berjaya mengharungi cabaran ini tanpa bergantung kepada ubat-ubat pelangsing yang banyak berada di pasaran. Ini dapat dibuktikan apabila kebanyakan peserta berjaya menurunkan peratus berat badan seiring dengan penurunan peratus paras kolestrol dan lemak.

Program pada kali ini menunjukkan peratus penurunan berat badan dan lemak yang tinggi berbanding sebelum ini. Seramai 33 peserta telah berjaya menurunkan peratus penurunan berat badan antara 10.3% ke 31.6% sementara baki peserta yang lain berjaya menurunkan penurunan antara 1.3% ke 8.8%.

BAKAT Darat telah mengungguli kategori individu dan juga kumpulan, sementara BAKAT Udara menduduki tempat kedua, BAKAT Laut tempat ketiga dan diikuti dengan BAKAT Gabungan.



MAJLIS BUNGKUSAN SUMBANGAN HARI RAYA

Artikel & Foto : L.t Kol Esah binti Sulaiman (BAKAT ATM)

Salah satu aktiviti tradisi yang dilaksanakan sempena bulan Ramadhan ialah acara pembungkusan barang-barang sumbangan yang akan diserahkan kepada anggota tentera yang bertugas pada pagi Syawal tidak kira di mana anggota bertugas. Seramai 70 Ahli BAKAT ATM yang diketuai oleh Pengerusi Jemaah Tertinggi BAKAT ATM, Puan Sri Datin Sri Umi Kalsom beserta Pengerusi Jemaah Tertinggi BAKAT Darat, BAKAT Laut, BAKAT Udara, Bakat Gabungan dan Ahli Jemaah Tertinggi yang lain telah membantu anggota tentera menyiapkan beg-beg yang berisi dengan kuih muih, ketupat, rendang, kain pelikat berserta tuala adalah sebahagian dari barang-barang yang disumbangkan oleh para dermawan. Pada tahun ini BAKAT telah menyumbang 3 jenis kuih iaitu coklat chip, biskut butter dan biskut cornflakes.

Acara Pembungkusan telah diadakan pada 28 Julai 2011 bertempat di Dewan Seroja Kem KEMANTAH. Diharap dengan adanya sumbangan seperti ini, para anggota yang bertugas terutama jauh di luar negara akan merasa dihargai apabila menerima bungkusan tersebut.



Pengarah Kebajikan Kol Roslan bin Hj. A. Rahman Memberi Taklimat Kepada Ahli-Ahli BAKAT ATM tentang Barangan Yang Akan di Bungkus



YBhg Puan Sri Datin Sri Umi Kalsom bte Wan Awang bersama-sama Ahli-Ahli BAKAT Tekun Membungkus Barang Hari Raya



YBhg Puan Sri Datin Sri Umi Kalsom bte Wan Awang Memeriksa Kuih Muih Sebelum Pembungkusan dimulakan

PELAKSANAAN PROGRAM PENDIDIKAN KESIHATAN REPRODUKTIF DAN SOSIAL (PKRS)

Artikel & Foto : Bahagian Komunikasi Korporat Jabatan Latihan Khidmat Negara



PROGRAM LATIHAN KHIDMAT NEGARA

Majlis Latihan Khidmat Negara yang bermesyuarat pada 23 Disember 2010 telah bersetuju supaya Program Pendidikan Kesihatan Reproktif dan Sosial (PKRS) dilaksanakan di dalam PLKN. Program PKRS yang digubal dengan kerjasama Lembaga Penduduk dan Pembangunan Keluarga (LPPKN), Kementerian Pembangunan Wanita, Keluarga dan Masyarakat ini bertujuan untuk memperkasa remaja dan golongan muda dalam menangani isu-isu gender, kekeluargaan, masalah sosial dan kesihatan reproduktif.

Melalui pendidikan ini juga ia dapat meningkatkan pengetahuan dan kemahiran bagi membolehkan pelatih PLKN bertindak sebagai penyebar maklumat penting berkenaan kemahiran hidup di kalangan rakan sebaya. Selain itu, program ini juga diharap dapat membentuk remaja yang bertanggungjawab, berakhlak, berdaya tahan di dalam menghadapi cabaran perubahan dalam kehidupan masa kini.

Salah satu langkah untuk membendung gejala sosial yang semakin berleluasa di kalangan remaja/belia muda adalah melalui pemberian Pendidikan Kesihatan Reproktif dan Sosial (PKRS). Tanpa pengetahuan dan kemahiran, remaja tidak dapat menimbang baik buruknya sesuatu perkara seterusnya tidak dapat membuat keputusan dengan sebaiknya dalam melindungi diri mereka dari terjebak atau melakukan perkara yang tidak diinginkan oleh dirinya sendiri mahupun keluarga dan masyarakat.

Pendekatan pelaksanaan Modul PKRS (Modul Kesejahteraan Hidup) adalah secara holistik dan menyeluruh serta merangkumi aspek biologiikal, sosio-budaya, psikologiikal dan kerohanian. Modul ini memberi penekanan kepada pembinaan kemahiran untuk menghindari tingkah laku berisiko tinggi dan membuat pilihan bijak dan tepat berhubung kesihatan reproduktif dan sosial mereka.

Modul PKRS (Modul Kesejahteraan Hidup) yang berfokus kepada kesihatan reproduktif dan sosial dibangunkan oleh Lembaga Penduduk dan Pembangunan Keluarga Negara (LPPKN) khususnya untuk remaja yang berumur 16 tahun ke atas. Pihak LPPKN telah menggunakan modul tersebut dalam pelbagai program pembangunan kemahiran di sekolah-sekolah, kolej dan institusi pengajian tinggi kerajaan dan swasta. Modul ini telah mendapat respon yang positif daripada masyarakat dan penilaian Pra dan Pasca Program Latihan Modul Kesejahteraan Hidup telah menunjukkan peningkatan yang signifikan dalam pengetahuan, sikap dan kemahiran para peserta program.

Pendidikan Seks dikenali sebagai Pendidikan Kesihatan Reproktif dan Sosial (PKRS) bagi mengelakkan kekeliruan berhubung istilah pendidikan seks yang memberi konotasi yang negatif dalam kalangan masyarakat.

Pendidikan Kesihatan Reproktif dan Sosial lebih kepada membentuk golongan remaja yang sihat, berdaya tahan (resilien), berakhlak, bertanggungjawab serta berupaya menghadapi cabaran perubahan dalam kehidupan masa kini.

Kurikulum modul ini merangkumi empat komponen utama iaitu Gender, Kekeluargaan, Pembangunan Kemahiran dan Hidup Tanpa Keganasan. Topik-topik di bawah setiap komponen adalah seperti berikut:

GENDER

Definisi & Konsep Gender

Perlembagaan Persekutuan, Konvensyen & Treati

Antarabangsa

Isu Hak dan Diskriminasi

Kekeluargaan

Keluarga Ku Sayang

SEKSUALITI

Nilai dan Tanggungjawab

Sudahkah Saya Bersedia?

Bukan Saya Bukan Sekarang

Pembangunan Kemahiran

Menghindari Situasi Yang Berisiko Tinggi

Kemahiran Teknik Penangguhan dan Penolakan

Hidup Tanpa Keganasan

Definisi dan Konsep Keganasan

Gangguan Seksual

Rogol

Modul ini juga selaras dengan dasar-dasar dan perundangan negara serta komitmen Kerajaan terhadap perjanjian-perjanjian antarabangsa. Agama dan nilai murni amat penting untuk jati diri remaja. Oleh itu, pendidikan ini turut menyelitkan unsur-unsur ini. Ini adalah bezanya antara pendidikan kesihatan reproduktif acuan Malaysia berbanding negara barat. Untuk menarik minat remaja dan golongan muda, modul ini adalah dalam bentuk interaktif dengan menggunakan kaedah main peranan, sketsa, kerja kumpulan dan perbincangan. Objektif modul adalah untuk meningkatkan pengetahuan dan kemahiran para remaja untuk membuat pilihan bijak berhubung isu kesihatan reproduktif dan sosial mereka.

Program PKRS untuk pelatih PLKN akan menggunakan Modul Kesejahteraan Hidup yang dibangunkan oleh LPPKN, sebuah agensi di bawah Kementerian Pembangunan Wanita, Keluarga dan Masyarakat (KPWK). Modul ini merupakan modul tambahan dalam Program Latihan Khidmat Negara dan modul ini akan dilaksanakan pada bulan Mei 2011.

Modul ini telah dibangunkan dengan mengambil kira keperluan dan sensitiviti kaum, agama dan budaya dalam masyarakat majmuk Malaysia. Juga dalam pembangunan modul PKRS, LPPKN telah mendapat input dan maklumbalas daripada pelbagai agensi kerajaan dan bukan kerajaan termasuk NGO seperti Kementerian Kesihatan, Kementerian Pelajaran, Jabatan Kemajuan Islam Malaysia (JAKIM) dan Malaysian Consultative Council of Buddhism, Christianity, Hinduism, Sikhism dan Taoism Malaysia.

KURSUS BAGI JURULATIH

Dalam usaha bagi melaksanakan modul ini dengan jayanya, JLKN telah menyediakan kursus khas bagi semua jurulatih yang berkenaan untuk mendalami dan memahami keseluruhan kandungan modul tersebut mengikut skema khusus yang telah disediakan oleh LPPKN.

Sebanyak 6 kursus telah diadakan bermula dari 20 Mac 2011 hingga 7 Mei 2011 di Kem PLKN Permata Resort Melaka, Kem PLKN Putra Sentosa Sarawak, Kem PLKN Cancun Park Kelantan, Kem PLKN KK Di Bawah Bayu Sabah dan di Kem PLKN Dusun Minda Resort Kedah yang melibatkan seramai 1,102 orang jurulatih seluruh Malaysia. Program Pendidikan Kesihatan Reproduksi Dan Sosial ini telah mula dilaksanakan pada 15 dan 16 Jun 2011 iaitu sewaktu pelatih kumpulan 2 siri 8, 2011 sedang menjalani latihan.



DIALOG BERSAMA PRESIDEN CUEPACS

Artikel : Mejar Setia Perwira bin Mohd Wazir Foto : Megat Mohd Firdaus bin Megat Ahmad



Dato' Hj Omar Hj Osman Presiden Kongres Kesatuan Pekerja-pekerja Dalam Perkhidmatan Awam (CUEPACS) bersama Encik Ahmad Shah Mohd Zain Presiden Kesatuan Pekerja Pekerja Awam Angkatan Tentera Malaysia (KESATRIA) telah mengunjungi Wisma Pertahanan untuk program dialog dengan Penjawat Awam di Kementerian Pertahanan. Acara yang dianjurkan oleh Cawangan Kerja Awam, Bahagian Pengurusan Sumber Manusia Kementerian Pertahanan telah diadakan di Auditorium Wisma Pertahanan pada 20 Julai 2011.

Dialog yang diadakan sepanjang dua jam tersebut, Dato' Hj Omar Hj Osman membicarakan pelbagai isu-isu semasa berkenaan penjawat awam. Antara isu yang dibincangkan adalah Skim baru SSM dimana kajian semula gred-gred penjawat awam, Sijil Pelajaran Malaysia (SPM) adalah kelulusan minima untuk menjadi penjawat awam dimasa hadapan, pembekuan sementara pengambilan jawatan baru bermula 1 Jun hingga 31 Ogos 2011, kesamarataan pembayaran cola kepada semua penjawat awam pada nilai RM 300, Kebajikan pekerja dan Kajian semua Imbuhan Tetap Perumahan.

Nasihat Presiden CUEPACS kepada semua penjawat awam 'Jangan ponteng kerja', 'Jangan banyak berpolitik' dan 'Kerja dengan tekun'. Bagi menanggung beban kewangan, CUEPACS telah memohon kerajaan mempertimbangkan pemberian dua bulan bonus kepada seluruh penjawat awam tahun ini. Dialog diakhiri dengan sesi soal jawab dan penyampaian cenderahati oleh Puan Liza binti Bakar, Timbalan Setiausaha Bahagian, Bahagian Pengurusan Sumber Manusia kepada presiden CUEPACS.



JASAMU DIKENANG

Artikel : Lt Kdr Rahimah Binti Taib TLDM Foto : LK STN (I) Roselly bin Ali

Bagi mengenang jasa-jasa yang pernah dicurahkan oleh veteran-veteran dalam mempertahankan kemerdekaan Tanah Melayu selepas kemerdekaan dan semasa darurat, Kerajaan Malaysia telah mengurniakan Pingat Jasa Malaysia kepada penerima yang layak. Semua penerima yang layak diwartakan sebagaimana dalam Warta Kerajaan No. 22 Jil. 49 27 Oktober 2005 No. 17718 Statut PJM. Penerima terdiri dari semua veteran yang terlibat ketika Darurat di Tanah Melayu tanpa mengira kewarganegaraan.

Pada 26 Julai 2011, satu majlis istiadat penganugerahan PJM telah disempurnakan oleh YB Menteri Pertahanan Malaysia, Datuk Seri Dr Ahmad Zahid Hamidi di Bilik Teratai, Kementerian Pertahanan. Penerima merupakan 8 warga veteran yang menganggotai Pasukan Pengaman British yang melibatkan veteran Pasukan Pengaman yang menetap di negara Malaysia dan seorang dari Singapura.

Pengurniaan PJM telah dirancang untuk dikurniakan secara berperingkat - peringkat semenjak tahun 2004 kepada veteran Pasukan Pengaman luar negara yang pernah berkhidmat di negara ini dalam tempoh 31 Ogos 1957 - 12 Ogos 1966 yang dianggarkan berjumlah melebihi 79 ribu anggota. Kelayakan bagi pengurniaan PJM kepada veteran dari Pasukan Pengaman ini disahkan oleh pihak National Malaya Borneo Veteran Association (NMBA) melalui Kedutaan Malaysia di London.


Sehingga ke hari ini, penganugerahan PJM masih dilakukan. Dianggarkan hampir 50% PJM telah disampaikan kepada veteran-veteran dari kalangan negara pengaman oleh Pegawai-Pegawai Tinggi Kerajaan Malaysia di United Kingdom, Australia, New Zealand, Kanada dan lain-lain negara yang turut menyertai Negara Pengaman. Pengurniaan PJM dari kalangan veteran yang layak menerimanya mengikut Statut PJM Warta Kerajaan yang dinyatakan di atas akan diteruskan dari semasa ke semasa oleh Kementerian Pertahanan.

Kali terakhir majlis penganugerahan PJM ini diadakan di Malaysia ialah pada tahun lalu sempena hari kemerdekaan.

Senarai Penerima PJM 27 Julai 2011

- Mr Paul Dorairaj berkhidmat pada 1959-1966
- Mr Philip Geoffrey Ford berkhidmat pada 1964-1965
- Mr Stanley Quinn berkhidmat pada 1965-1967
- Mr Chistopher Syer berkhidmat pada 1960-1962
- Mr Nicholas Waterhouse berkhidmat pada 1964-1966
- Maj (Rtd) Richard Lowe berkhidmat pada 1959-1965
- Mr Raymond Wells berkhidmat pada 1965-1967
- Mr Villanuera Adrian berkhidmat pada 1964-1966





A.P.C

“PEKERJA MEREALISASI TRANSFORMASI NEGARA”

Artikel : Nazrie bin Saini Foto : Lillis Syazwaniza bt Mohd Yatim (Pelatih UNISEL)

“Pekerja Merealisasikan Transformasi Negara” menjadi tema kearah membudayakan pekerja supaya mempunyai semangat berdaya saing sekaligus menjadi penyumbang utama kepada perubahan ekonomi negara. Kementerian Pertahanan setiap tahun menganjurkan Majlis Anugerah Perkhidmatan Cemerlang di mana untuk tahun ini telah diadakan sebanyak tiga peringkat. Peringkat pertama telah diadakan pada 12 Mei 2011 telah disempurnakan oleh YB Dato’ Seri Dr Ahmad Zahid bin Hamidi, Menteri Pertahanan Malaysia seramai 100 penerima telah dianugerahkan mengikut kategori anggota awam, wakil setiap perkhidmatan dan 10 penerima Pingat Perkhidmatan

dan Pekerti Terbilang (PPT). Sesi kedua diadakan pada sebelah petang telah disempurnakan oleh YB Datuk Dr Abd Latiff bin Ahmad, Timbalan Menteri Pertahanan dan 100 pegawai awam dan tentera menerima anugerah masing-masing. Peringkat ketiga pula diadakan pada 13 Mei 2011 dan disempurnakan oleh YBhg. Dato’ Sri Dr. Ismail bin Haji Ahmad, Ketua Setiausaha Kementerian Pertahanan. Acara tahunan ini diadakan bagi menghargai penjawat awam dan tentera yang telah mempamerkan prestasi kerja yang amat cemerlang dan sebagai titik tolak pembangkit semangat kepada semua pekerja agar sentiasa berusaha dan mengekalkan kualiti cemerlang dalam kerja.



KARNIVAL 1MINDEF SASAR BUKAN BUMIPUTERA DI SANDAKAN

Artikel : Mej. Khairuddin bin Ismail Foto : L.K STN (I) Roselly bin Ali

SANDAKAN - Kementerian Pertahanan telah menganjurkan Karnival 1MinDef bagi siri ketiga tahun ini pada 22 hingga 24 Julai 2011 bertempat di Padang Majlis Bandaran Sandakan, Sabah. Program tiga hari ini dirasmikan oleh YB Dato' Seri Dr Ahmad Zahid bin Hamidi, Menteri Pertahanan pada 22 Julai 2011 jam 4.00 petang. Turut hadir ialah Dato' Ismail bin Hj Ibrahim, Timbalan Ketua Setiausaha (Pengurusan) dan Pegawai-pegawai Kanan Tentera dan Awam.

Objektif utama program adalah untuk memberi peluang kepada orang ramai mendapatkan maklumat tentang Kementerian Pertahanan khususnya Angkatan Tentera Malaysia (ATM) sekaligus menarik minat mereka terutamanya dari kalangan kaum bukan bumiputera untuk menjadikan ATM sebagai kerjaya pilihan.

Karnival ini merupakan salah satu medium untuk menyalurkan maklumat semasa kepada masyarakat terutamanya tentang fungsi dan peranan agensi-agensi yang bernaung di bawah Kementerian Pertahanan.

Menerusi pendedahan yang diberikan diharap dapat menarik minat orang ramai untuk merebut peluang pendidikan dan perniagaan yang ditawarkan menerusi institusi dan agensi yang terletak di bawah Kementerian.

Selain itu, karnival ini juga menyediakan maklumat kepada pesara-pesara ATM berkenaan dengan kemudahan-kemudahan yang disediakan oleh pihak kerajaan kepada mereka dan pada masa yang sama menjadi medium untuk masyarakat menyalurkan cadangan serta aduan menerusi kaunter Khidmat Pelanggan.

Ketiga-tiga perkhidmatan ATM iaitu Tentera Darat (TD), Tentera Laut Diraja Malaysia (TLDM) dan Tentera Udara Diraja Malaysia (TUDM) di samping Jabatan Latihan Khidmat Negara (JLKN), Jabatan Hal Ehwal Veteran (JHEV), Perbadanan Hal Ehwal Bekas Angkatan Tentera (PERHEBAT), Universiti Pertahanan Nasional Malaysia (UPNM) dan Maktab Tentera DiRaja (MTD) merupakan perkhidmatan/ agensi/ jabatan di bawah kementerian yang terlibat mempamerkan kepelbagaian profesion, peluang pendidikan dan program inovasi yang wujud di dalam perkhidmatan masing-masing.

Selain daripada pameran kerjaya dan pendidikan, para pengunjung juga berpeluang untuk menyaksikan persembahan hiburan oleh Badan Kesenian MinDef dan Tentera Darat pada malam 22 dan 23 Julai 2011 serta mendapatkan perkhidmatan pemeriksaan perubatan dan pergigian secara percuma oleh Bahagian Perkhidmatan Kesihatan ATM.

Pihak TLDM menerusi KD Sri Sandakan pula mengadakan program hari terbuka dengan memberi peluang kepada para pelawat yang ingin meninjau dan merasai pengalaman berada di atas kapal lojistik terbesar kebanggaan negara di sepanjang program ini diadakan.

Karnival ini diadakan selama tiga hari ini telah dibuka mulai jam 9.00 pagi hingga 5.00 petang. Jumlah pengunjung yang datang dianggarkan seramai lebih 20,000 orang termasuk 11,633 orang yang mengunjungi KD Sri Mahawangsa.





YB Dato' Seri Dr. Ahmad Zahid Bin Hamidi, Menteri Pertahanan telah melawat ruang pameran JHEV sempena merasmikan Karnival 1MinDef pada 22 Julai 2011 bertempat di Padang Majlis Bandaran Sandakan, Sabah. Program tiga hari ini bermula pada 22 hingga 24 Julai 2011. Di kaunter JHEV tersebut, pengunjung boleh mendapatkan replika bunga raya selepas menderma ke Tabung RHP 2011.





LAWATAN PEMANTAUAN PROGRAM KESIHATAN BAKAT ATM

Artikel & Foto : L.t Kol Esah binti Sulaiman (BAKAT ATM)

Untuk 3 tahun berturut-turut BAKAT ATM telah menganjurkan Program Kesihatan bertujuan untuk menggalakan ahli-ahlinya sentiasa berusaha untuk menjaga kesihatan demi kesejahteraan dan keharmonian keluarga. Bagi Tahun 2011, program telah dilaksanakan di Kuantan Pahang yang melibatkan Ahli-Ahli BAKAT dari kawasan 4 Bgd mewakili BAKAT Darat, BAKAT Laut diwakili oleh BAKAT Pangkalan TLDM Tanjung Gelang sementara BAKAT Udara diwakili oleh BAKAT PU Kuantan. Seramai 79 peserta BAKAT kawasan Kuantan telah mengambil bahagian. Program telah bermula pada 7 Feb 2011 dan akan tamat pada 27 Julai 2011.

Pada 4 Mei 2011, satu lawatan pemantauan telah diadakan oleh koordinator program iaitu Datin Seri Noor Azrina bte Abdullah yang telah mengambil alih tugas dari Datin Rodzi bte Abdullah. Selain mendengar taklimat ringkas, Datin Seri turut menyaksikan latihan yang dilaksanakan oleh

kumpulan tersebut sambil meluangkan masa beramah mesra dengan peserta-peserta. Kesempatan ini juga diambil untuk sesi dialog dan mendapatkan maklumbalas dari para peserta. Pada keseluruhan para peserta telah menunjukkan komitmen yang tinggi di sepanjang program dilaksanakan. Ini terbukti dengan adanya peserta yang telah berjaya mengurangkan berat badan sebanyak 12 kg dalam masa 3 bulan.

Sebelum mengakhiri lawatan, kata-kata nasihat dan perangsang telah diberikan dan beliau berharap agar peserta dapat mengikuti program ini dengan jayanya dan elakkan dari mengambil jalan mudah. Segala nasihat dan panduan yang diberikan oleh Pakar Pemakanan dan Pakar Senaman serta dari Jurulatih perlu diikuti sebaik mungkin. Ini adalah untuk mengelakkan dari risiko kecederaan atau masalah yang akan timbul nanti.



YBhg Datin Seri Noor Azrina Binti Abdullah
Disambut Oleh Peserta Program Kesihatan Bakat ATM

LAWATAN KE RUMAH PEMENANG ANUGERAH IBU MITHALI 2010

Artikel & Foto : L.t Kol Esah binti Sulaiman (BAKAT ATM)

Pada 11 Mei 2011 BAKAT ATM yang diketuai oleh Datin Norimah bte Mat, salah seorang Ahli Jemaah Tertinggi BAKAT ATM, mewakili Pengerusi Jemaah Tertinggi BAKAT ATM, telah mengadakan lawatan ke rumah Puan Hjh Awiah bte Awi di Kampung Kesang Muar Johor. Beliau merupakan bekas Ahli BAKAT Semboyan sehingga arwah suami beliau bersara pada tahun 1979. Lawatan bertujuan untuk menyampaikan Surat Penghargaan dari BAKAT ATM di atas kejayaan beliau memenangi Anugerah Ibu Mithali Tahun 2010. Anugerah ini diilhamkan oleh Yayasan Dakwah Islamiah Malaysia (YADIM) khas untuk ibu-ibu muslim yang berjaya membimbing dan mendidik anak-anak dengan sempurna disamping berbakti kepada masyarakat dan negara.

Puan Hjh Awiah telah dipilih berdasarkan kejayaan beliau beserta suami mendidik seramai 9 orang anak yang kesemuanya lelaki dan berjaya di dalam kehidupan masing-masing. Di antaranya adalah doktor, pensyarah, usahawan berjaya serta Pengetua Tahfiz. Buat masa kini, beliau lebih menumpukan perhatian kepada madrasah dan Tahfiz Al-Quran yang dibina khas untuk anak-anak yatim dan orang-orang miskin serta menjadikan rumah sendiri sebagai kelas pengajian agama. Sehingga kini beliau dengan bantuan anak-anak telah berjaya membina 6 sekolah tahfiz dengan mempunyai 300 pelajar. Sesungguhnya kejayaan beliau mendidik anak-anak yang ramai dan berjaya haruslah dijadikan contoh kita semua.

Ybhg Datin Norimah Binti Mat Mewakili Pengerusi Jemaah Tertinggi Bakat Atm Menyampaikan Surat Penghargaan Kepada Puan Hajah Awiah



Sesi Ramah Mesra Rombongan Bakat Atm Dan Keluarga Puan Hajah Awiah Binti Awi

PENUKARAN PUCUK PIMPINAN BAKAT ATM

Artikel & Foto : L.t Kol Esah binti Sulaiman (BAKAT ATM)

Seiring dengan penukaran pucuk pimpinan tertinggi Angkatan Tentera Malaysia (ATM) baru-baru ini, BAKAT atau Badan Kebajikan Keluarga Angkatan Tentera turut menyaksikan acara Serah Terima pucuk pimpinan Pengerusi Jemaah Tertinggi BAKAT ATM. Acara ringkas tetapi penuh simbolik telah diadakan di Ruang Perkasa Wisma KEMENTAH pada 15 Jun 2011 dan telah disaksikan oleh seramai 25 Ahli-Ahli BAKAT yang terdiri dari isteri-isteri Pegawai berpangkat Mej Jen ke atas di sekitar kawasan Lembah Klang.

Acara dimulakan dengan Majlis Menandatangani Sijil Serah Terima Tugas di antara Puan Sri Datin Sri Noorainee bte Abd Rahim yang menyerahkan tugas kepada Puan Sri Datin Sri Umi Kalsom bte Wan Awang Pengerusi Jemaah Tertinggi BAKAT ATM yang baru. Ini diikuti dengan amanat perpisahan daripada Mantan Pengerusi di mana amanat beliau mengingatkan para hadirin bahawa fokus utama kewujudan BAKAT adalah untuk memberikan bantuan kebajikan kepada keluarga terutama isteri-isteri dan anak-anak mengikut peraturan dan kemampuan yang sedia ada. Peranan BAKAT akan lebih dihargai jika setiap ahli terutama isteri-isteri pegawai kanan menzahirkan segala peranan yang perlu dilaksanakan dengan niat dan komitmen yang ikhlas.

Pada masa yang sama beliau juga merakamkan ucapan terima kasih kepada semua Ahli-Ahli BAKAT yang telah banyak membantu di sepanjang tempoh beliau melaksanakan tugas sebagai Pengerusi BAKAT ATM. Beliau juga berharap agar Ahli-Ahli BAKAT ATM akan terus memberikan kerjasama yang jitu kepada Pengerusi baru agar Misi dan Visi BAKAT dapat terus dilaksanakan. Kepada Puan Sri Datin Sri Umi Kalsom beliau mengucapkan selamat menjalankan tugas sebagai Pengerusi Jemaah Tertinggi yang baru dan berharap agar Puan Sri Datin Sri Umi akan dapat terus memacu BAKAT ATM ke arah yang lebih cemerlang sejajar dengan visi BAKAT ATM iaitu menjadi Badan Kebajikan yang progresif, beretika, penyayang dan berilmu.

Mantan Pengerusi Jemaah Tertinggi BAKAT ATM
Puan Sri Noorainee bte Abd Rahim Menyampaikan
Amanat Terakhir Kepada Para Hadirin





PANTAI AIR PAPAN JADI SAKSI PENUTUP KURSUS ASAS KOMANDO SIRI 1/2011

Artikel : Lt Siti Aishah binti Noor Foto : Megat Mohd Firdaus bin Megat Ahmad

12 Jun 2011 merupakan tarikh bersejarah bagi semua penuntut yang telah berjaya menamatkan Kursus Asas Komando Siri 1/2011 yang berlangsung di Pantai Air Papan, Mersing, Johor. Lebih manis lagi bagi semua penuntut kursus tersebut adalah Upacara Penganugerahan Beret Hijau iaitu simbolik kepada kursus tersebut telah disempurnakan oleh YBhg Panglima Tentera Darat, Jeneral Tan Sri Dato' Sri Zulkifeli bin Mohd Zin. Turut diserahkan oleh YBhg Panglima Tentera Darat sebagai simbolik kursus tersebut adalah Pisau Komando dan Diploma.

Keghairahan penonton yang terdiri daripada ibubapa dan pengunjung Pantai Air Papan dikejutkan dengan letupan berbalas tembakan dan teriakan dalam Demonstrasi Serangan Pantai yang dipersembahkan oleh Penuntut-penuntut Kursus AK Siri 1/2011 di awal kemunculan kumpulan itu.


Kursus Asas Komando Siri 1/2011 dilaksanakan mulai 8 Mac 2011 hingga 11 Jun 2011 yang dikendalikan oleh

Pusat Latihan Peperangan Khusus, Kem Sungai yang Undang pada mulanya disertai oleh 4 Pegawai dan 116 LLP. Namun, jumlah yang berjaya mengatasi semua peringkat tersebut cuma 4 pegawai dan 38 LLP sahaja. Penuntut-penuntut yang berjaya menamatkan kursus yang mencabar ini layak menjadi Warga Gerak Khas atau lebih dikenali dengan nama 'KOMANDO'. Semua penuntut Kursus Asas Komando perlu melepasi 5 peringkat sebelum begelar Komando. Peringkat modul yang diuji adalah Peringkat Kem, Peringkat Hutan, Peringkat Paya, Peringkat Laut dan Peringkat Penamat.

Lebih membanggakan lagi, Kapt Ahmad Muadz bin Ahmad Suhaili dari Batalion Kelima Rejimen Askar Melayu Diraja telah dinobatkan sebagai Penuntut Keseluruhan Terbaik bagi Kursus Asas Komando bagi Siri tersebut.

Pengalaman, semangat dan keberanian semua penuntut Kursus Asas Komando sememangnya seteguh air pantai memukul tebing yang tak pernah surut.





MISC yang telah diserapkan sebagai Pasukan Simpanan Sukarela TLDM atau PSSTLDM. Anggota Tetap ATM terdiri dari pasukan khas atau elit dari ketiga-tiga cabang perkhidmatan ATM (Darat, Laut dan Udara) dan kumpulan sokongan daripada Bahagian Kesihatan. Tim BM6 diketuai oleh Kdr Ahmad Nazri bin Sharif PSSTLDM selaku Pegawai Memerintah dan Lt Kdr Karim bin Sarbi TLDM sebagai Ketua Operasi OP Fajar 10/11.

Pelancaran BM6 dilihat sebagai satu manifestasi kepada hubungan tentera dan awam atau Civil Military Cooperation dalam sama-sama menyokong usaha-usaha kearah keamanan dan kestabilan sejagat.

KEJAYAAN OP FAJAR

Operasi Fajar telah bermula pada 29 Ogos 2008 dengan penugasan kapal-kapal TLDM bagi menjaga kepentingan strategik negara. Namun, disebabkan kekangan pengoperasian kapal-kapal TLDM ekoran aset yang terhad dan kos pengoperasian yang tinggi, TLDM telah membentuk satu perkongsian strategik dengan MISC di mana sebuah kapal BM5 telah diserapkan ke dalam inventori TLDM untuk melaksanakan operasi bagi menentukan keselamatan kapal dagang yang berkepentingan kepada negara di perairan Teluk Aden.

Sehingga kini, kapal-kapal TLDM yang melaksanakan Op Fajar 1 hingga 4 telah berjaya mengiringi sebanyak 92 buah kapal, manakala manakala kapal Auxiliary BM5 telah berjaya melaksanakan 6 Op Fajar dengan mengiringi sebanyak 172 buah kapal. Secara keseluruhan kapal yang telah berjaya dilindungi dalam Op Fajar termasuk iringan oleh kapal-kapal TLDM sebelum ini ialah sebanyak 264 buah. Berdasarkan statistik yang diperolehi, hasil pelaksanaan Op Fajar pada tahun 2010 sahaja hampir RM 63.3 bilion nilai dagangan negara yang dibawa oleh kapal-kapal dagang MISC telah berjaya dilindungi. Apa yang amat membanggakan ialah sehingga kini tiada sebarang laporan rampasan yang melibatkan kapal-kapal dagang dari Malaysia sejak Op Fajar dilaksanakan.

Sepanjang pengoperasian Op FAJAR, TLDM telah menugaskan 5 buah kapal TLDM secara pengiliran di Perairan Teluk Aden sejak bermulanya misi pada Ogos 2008 yang lalu.

Antara kejayaan lain yang dicapai melalui Op Fajar ialah:

Kejayaan KD LEKIU dan KD SRI INDERAPURA telah berjaya menyelamatkan kapal-kapal Bunga Melati 2 dan Bunga Melati 5 semasa OP Fajar pertama.

Kejayaan KD SRI INDERASAKTI menyelamatkan kapal dagang India, MV Abdul Kalam Azad dan kapal dagang China, Zhen Hua 4.

Keupayaan BM5 menyelamatkan kapal MT Bunga Laurel daripada tawanan lanun pada 21 Jan 2011 semasa melaksanakan Op Fajar 8. MT Bunga Laurel berjaya ditawan semula dengan semua anak kapalnya diselamatkan dalam tempoh tidak sampai dua jam selepas dirampas lanun

PERKONGSIAN STRATEGIK

Dengan adanya Kapal Auxiliary TLDM seperti BUNGA MAS LIMA dan BUNGA MAS ENAM ini, TLDM mampu melaksanakan pemantauan di luar lingkungan operasi beyond normal operating envelope secara optimum dan berhemah. Menerusi pengoperasian BUNGA MAS LIMA, TLDM telah berjaya menjimatkan kos operasi sebanyak RM 3 juta sebulan. Lebih signifikan lagi, perkongsian bijak antara TLDM dan MISC ini telah berjaya memberi perlindungan terhadap barangan dagangan negara yang bernilai berbillion ringgit yang melalui Perairan Teluk Aden. Projek BUNGA MAS LIMA juga telah berjaya menempatkan Angkatan Tentera Malaysia di tangga kedua dalam Pertandingan Anugerah Inovasi Perdana Menteri bagi tahun 2011.

Dari sudut perniagaan pula, pengoperasian kapal-kapal auxiliary ini telah berjaya meningkatkan keyakinan dan kesetiaan para pelanggan terhadap perkhidmatan MISC dan syarikat ini terus menjadi pilihan utama mereka dalam memastikan kargo yang dibawa sampai ke destinasi dengan selamat. MISC merupakan syarikat perkapalan utama di dunia yang menggunakan kapal tanker LNG dan dari segi pemasaran, perolehan aset dan pendapatan, ia merupakan syarikat perkapalan keempat yang terbesar di dunia. MISC juga menduduki tangga keempat di dunia dalam pengoperasian Aframax tankers yang membawa barangan dagangan berupa petroleum.

Perkongsian strategik antara TLDM dan MISC juga turut merangka kejayaan dalam melahirkan Pasukan Latihan Pegawai Simpanan (Laut) atau PALAPES (L) di Akademi Laut Malaysia (ALAM) dan Pasukan Simpanan Sukarela TLDM (PSSTLDM) yang mempunyai kepakaran tertentu. Pengambilan pertama PALAPES (L) ALAM yang dirasmikan pada tahun lalu mempunyai seramai 29 orang pegawai. Manakala terdapat 45 orang pegawai dan 43 orang lain-lain pangkat PSSTLDM yang berkepakaran perkapalan menerusi Operasi FAJAR. Bagi TLDM pula, pengoperasian Kapal Auxiliary TLDM ini merupakan satu komponen penting di dalam merealisasikan konsep HANRUH (Pertahanan Menyeluruh) yang terkandung di dalam Dasar Pertahanan Negara yang bertujuan untuk membuka peluang kepada lebih ramai sukarelawan yang berminat untuk mendalami ilmu kelautan, pertahanan dan keselamatan.

Laksamana Tan Sri Aziz turut menyatakan kejayaan-kejayaan yang telah dicapai melalui perkongsian strategik ini merupakan kejayaan bersama semua peringkat lapisan warga ATM dan MISC yang terlibat dalam operasi ini yang sentiasa meletakkan kepentingan negara pada peringkat tertinggi dalam menunaikan tugas dan tanggungjawab yang diamanahkan. Kejayaan ini turut mengundang pujian dan perhatian dari dalam dan luar negara. Selain itu, ianya juga membuktikan konsep penugasan kapal di dalam Op Fajar yang merupakan kerjasama unik di antara pihak ATM dengan badan-badan berkanun dan bukan kerajaan serta rakyat jelata dalam menjaga kedaulatan dan kepentingan negara melalui pendekatan pertahanan menyeluruh (HANRUH), boleh dilaksanakan di semua peringkat.

SPESIFIKASI BM6

Merujuk kepada perundangan antarabangsa, kapal auxiliary adalah tergolong dalam jenis-jenis kapal selain dari kumpulan kapal-kapal perang yang dimiliki atau di bawah kawalselia pentadbiran tentera. Ianya dioperasikan oleh sesebuah kerajaan dan diberi keistimewaan kuasa imuniti atau lebih dikenali sebagai sovereign immunity.

Kapal BM6 merupakan sebuah kapal kontena bersaiz 699TEUs, merupakan kapal dagang kedua yang didaftarkan di Malaysia yang telah diubahsuai dan dilengkapi dengan peralatan keselamatan bertujuan melindungi dan mengiringi kapal-kapal MISC yang membawa kepentingan negara di Perairan Teluk Aden dan perairan sekitarnya. Kerja-kerja pengubahsuaian telah dijalankan oleh MMHE (sebuah anak syarikat MISC) di limbungan kapalnya yang terletak di Pasir Gudang, Johor. Kapal BM6 telah diubahsuai dengan tambahan ruang simpanan senjata ringan, ruang komunikasi dan perubatan serta kemudahan tapak pendaratan helikopter dan bot untuk kegunaan pasukan perlindungan khas (PPK) ATM.

Konsep atau model pengoperasian kapal Auxiliary TLDM ini telah menjadi perbincangan dan rujukan kepada negara-negara yang terlibat bersama dalam operasi kepada negara-negara terlibat bersama dalam operasi di perairan Teluk Aden. Kejayaan-kejayaan yang telah dicapai hasil pengoperasian kapal Auxiliary TLDM ini telah mendapat perhatian komuniti antarabangsa termasuk Jerman, Jepun dan Korea Selatan dan TLDM mempunyai imej yang baik dan setanding dengan tentera laut di negara maju yang lain.

PTL berharap agar kerjasama ini akan menjadi kesinambungan kepada kerjasama strategic yang lain di pelbagai peringkat serta mampu membuka idea-idea baru yang lebih realistic dan berdaya maju. Usaha ini juga diharapkan mampu member kesedaran kepada kepada semua badan berkanun dan bukan kerajaan serta rakyat jelata dalam memikul tanggungjawab bersama dalam memelihara keselamatan dan melindungi kedaulatan negara daripada sebarang ancaman luaran mahupun ancaman dari dalam negara sendiri.



5S

Artikel & Foto : Jawatankuasa Promosi 5S MinDef

Dapatkan koleksi aktiviti 5S di alamat berikut: <http://galeri.mod.gov.my/bahagian/5s-mindef/>

• POLISI

- Kementerian Pertahanan
- Komited untuk meningkatkan
- Prestasi kerja bagi menjadikan
- Kementerian Pertahanan
- Sebuah organisasi bertaraf
- 5 bintang dengan mengamalkan
- Budaya kerja yang produktif dan kondusif

• OBJEKTIF

- Mewujudkan tempat kerja yang bersih, kemas & sistematik untuk keselesaan kakitangan
- Meningkatkan kerjasama antara kakitangan dalam melaksanakan tugas harian
- Mewujudkan disiplin yang tinggi dan berhemah dikalangan kakitangan
- Memastikan keselamatan ditempat kerja untuk setiap kakitangan
- Meningkatkan mutu perkhidmatan kerja melalui penerapan budaya kaizen (inovasi)



JAWATANKUASA PEMANDU 5S

PENASIHAT

Dato' Dr Hj Ismail
Bin Hj Ahmad

PENGERUSI

Y. Bhg. Datuk Dr. Ismail
Bin Haji Bakar

URUS SETIA
(UNIT INOVASI)

PENGERUSI
JAWATANKUASA
LATIHAN
WAN MERIAH BT IBRAHIM
(BPSM)

PENGERUSI
JAWATANKUASA
PROMOSI
AHMAD BIN OSMAN
(BPM)

PENGERUSI
JAWATANKUASA
AUDIT
MOHD FAUZI BIN ESHAK
(JHEV)

KETUA-KETUA
BAHAGIAN

info1

Gotong Royong Perdana • 1 Jun 2011


Tanggal 1 Jun 2011 program Gotong Royong Perdana telah diadakan untuk aktiviti amalan 5S. Majlis Gotong Royong ini telah dirasmikan oleh Y. Bhg. KSU di Foyer Wisma Pertahanan dengan dihadiri oleh pegawai-pegawai kanan Kementerian serta kakitangan-kakitangan awam. Majlis diserikan dengan nyanyian lagu negaraku serta 1Malaysia. Sememangnya semangat kerja berpasukan antara kakitangan terserlah sepanjang program diadakan.

info2

Laman Web 5S MinDef

<http://mindef5s.mod.gov.my>

Sebagai salah satu usaha Kaizen dalam Amalan 5S, Jawatankuasa Promosi 5S telah mengambil inisiatif mewujudkan laman web 5s MinDef. Antara tujuannya ialah sebagai perantara "knowledge sharing" sesama anggotakerja dan orang luar tentang Amalan 5s. Ini adalah sebahagian dari proses penambahbaikan Amalan 5S di MinDef.



info 3

Lawatan ke Bahagian Perumahan • 5 Mei 2011

Bagi menyemarakkan lagi semangat 5S di kalangan warga MinDef, program lawatan ke Bahagian Pinjaman Perumahan, Putrajaya telah diadakan. Lawatan yang penuh bermakna ini mencetuskan satu anjakan paradigma di kalangan peserta rombongan dan turut dikongsi dengan mereka yang tidak turut serta menerusi paparan gambar yang diambil sepanjang lawatan tersebut.

info 4

Lensa Aktiviti 5S



PERTUKARAN PUCUK PIMPINAN ATM

Majlis Serah Terima Tugas Panglima Angkatan Tentera Malaysia

Artikel : PR Darat & PR Udara Foto : Rujukan & Penerbitan UKK

Angkatan Tentera Malaysia sekali lagi menjalani perubahan tampuk pucuk pimpinan tertinggi iaitu Panglima Angkatan Tentera. 15 Jun 2011 menyaksikan majlis menandatangani dokumen penyerahan tugas dan penyerahan tongkat kuasa pemerintah Panglima Angkatan Tentera Malaysia telah dilaksanakan. Majlis pertukaran jawatan ATM kali ke 18 memperlihatkan pertukaran perjawatan dari Jeneral Tan Sri Dato' Sri Azizan bin Ariffin TUDM kepada Jeneral Tan Sri Zulkifeli Mohd Zin yang disaksikan oleh Menteri Pertahanan, YB Datuk Seri Dr Zahid bin Hamidi di Auditorium Kementah.

Majlis persaraan Tan Sri Azizan dimulai dengan Majlis Perbarisan Persaraan yang dilaksanakan dengan penuh istiadat di Pangkalan Udara Subang pada 15 Jun 2011 dan diikuti dengan menandatangani Majlis Serah Terima Terima Tugas. Dalam ucapan beliau, Jeneral Tan Sri Azizan melahirkan rasa penuh kepuasan selama beliau menerajui dan memimpin institusi Angkatan Tentera Malaysia selama setahun dan 10 bulan. Beliau juga mengucapkan terima kasih kepada semua pihak di atas sokongan dan kerjasama padu yang telah diberikan kepada beliau. "Secara keseluruhannya, saya amat berpuashati kepada telah dapat memimpin dan menentukan usaha-usaha pemodenan angkata, terutamanya peningkatan keupayaan Angkatan Tentera Malaysia yang lebih dikenali sebagai Forth Dimension Malaysian Armed Forces atau 4D MAF berjalan dengan lancar sepanjang era pemerintahan saya. Hasilnya pada hari ini, dapat kita lihat bahawa keempat-empat domain pertahanan negara iaitu permukaan, bawah permukaan, ruang udara dan maklumat telah diperkasa secara menyeluruh dan seimbang merangkumi aspek penstrukturan organisasi, rancangan perolehan aset-aset tempur berteknologi canggih, membudayakan nilai teras yang berwibawa, kepimpinan berintegriti dan pembangunan modal insan yang berkualiti" ucap beliau.

Beliau turut melahirkan penghargaan kepada agensi-agensi lain atas hubungan baik dan kerjasama jitu yang terjalin sehingga dapat melaksanakan OP PIRAMID yang mencerminkan kerjasama jitu antara ATM dan kerajaan Malaysia, pihak swasta dan agensi lain di luar negara. Kerjasama seperti ini mampu menterjemahkan konsep Pertahanan Menyerluruh (HANRUH) dan semangat ini wajar diteruskan oleh semua pihak baik semasa aman ataupun ketika berlakunya krisis.

Beliau turut merakamkan ucapan terima kasih atas kerjasama baik yang diberikan oleh warga awam di Kementerian. "Warga awam Kementerian dan warga Angkatan Tentera Malaysia ibarat 'aur dengan tebing', kita saling memerlukan antara satu sama lain. Setiap langkah

dan gerak-geri kita seharusnya senada, seirama dan sehaluan".

Jeneral Tan Sri Azizan turut berpesan kepada semua warga ATM agar dapat mengekalkan tahap disiplin yang tinggi kepada DISIPLIN adalah tunjang kewujudan seseorang anggota tentera. Pencemaran disiplin hanya akan merugikan diri dan yang paling penting akan menjejaskan kredibiliti organisasi.

Sebagai penghormatan kepada Jeneral Tan Sri Dato' Sri Azizan, beliau telah mengambil Tabik Hormat Kawalan Kehormatan Utama di Dataran Kementah dan seterusnya diiringi keluar oleh semua Pegawai Kanan dan warga ATM melalui Street Lining ke Balai Pangawal MinDef.

Panglima Angkatan Tentera Ke-18

Jeneral Tan Sri Dato' Sri Zulkifeli bin Mohd Zin sebagai Panglima Angkatan Tentera yang baru merupakan PAT yang ke-18 Angkatan Tentera Malaysia. Memulakan tugas secara rasmi sebagai PAT mulai 16 Jun 2011. Hari pertama bertugas, beliau telah mengambil tabik hormat Kawalan Kehormatan Utama di Dataran Kementah.

Perbarisan Ulung dan penyampaian Perintah Ulung beliau sebagai PAT telah disempurnakan pada 17 Jun 2011 di Dataran Panglima Tentera Darat, Kem Sungai Besi Kuala Lumpur.

Perintah Ulung Panglima Angkatan Tentera

Salam Sejahtera dan Salam 1Malaysia

Demi untuk menentukan kesejahteraan negara, Angkatan Tentera Malaysia akan tetap berdiri teguh di belakang Kerajaan. Kita akan terus bekerjasama dengan agensi-agensi Kerajaan yang lain dengan jitu dalam Pembangunan Negara Bangsa dan untuk menentukan keselamatan dan ketenteraman awam tetap terjamin. Sejajar dengan itu, Angkatan Tentera Malaysia akan meneruskan rancangan untuk memperkasa pertahanan negara dengan giat serta mengukuhkan keupayaan atur gerak, versetil dan daya memusnah di samping mempertingkatkan keupayaan Joint Situational Awareness. Bagi memenuhi matlamat itu, semua Perkhidmatan hendaklah menentukan aset-asetnya sentiasa berada di tahap pengoperasian yang tinggi demi untuk menentukan kemantapan kesiagaan keupayaan tempur Angkatan kita.

Pertahanan dan keselamatan negara ini secara jelas bergantung kepada sebuah Angkatan Tentera yang kredibel,



responsif, dinamik, mampu mengeksploit teknologi serta dianggotai oleh warga yang menikmati kepuasan untuk berkhidmat demi tanahair yang tercinta. Sehubungan itu, adalah amat penting untuk mencapai keseimbangan dalam elemen manusia, mesin dan kaedah bagi menentukan respons yang holistik, bersepadu serta berkesan. Justeru itu, demi untuk memastikan kepentingan agama, bangsa dan negara sebagai pegangan mutlak, maka kita akan memberi tumpuan ke atas aspek-aspek berikut:

PERTAMA : ANGKATAN SPEKTRUM PENUH

Sesuai dengan peranannya di masa aman, peranan Angkatan Tentera Malaysia akan terus membantu Pihak Berkuasa Awam dalam menjayakan dasar-dasar Kerajaan. Oleh yang demikian, Angkatan Tentera Malaysia hendaklah berkemampuan untuk memberi respons dalam pelbagai bentuk persekitaran. Selari dengan itu, Angkatan Tentera Malaysia akan menentukan agar elemen-elemennya sentiasa berupaya menonjolkan kesan sinergi dalam memberi respons di darat, laut, udara dan juga ruang siber.

KEDUA : PENGLIBATAN KEPIMPINAN

Penerapan aspek-aspek pemerintahan, kepimpinan serta pengurusan dalam setiap program yang melibatkan Angkatan Tentera Malaysia akan dapat menentukan pencapaian yang tinggi dan sistematik. Oleh itu, setiap peringkat pemerintahan hendaklah melaksanakan Penglibatan Kepimpinan atau Participative Leadership untuk menentukan semangat setiakawan yang sejati antara ketiga-tiga Perkhidmatan serta menjana sifat inovatif di kalangan warga mereka.

KETIGA : PENGUKUHAN KELAKUAN ORGANISASI ANGKATAN TENTERA

Dalam ruang lingkup ketenteraan, kelakuan organisasi atau organizational behavior didorongi oleh disiplin, tradisi, nilai serta etos yang diguna pakai oleh setiap warga tentera. Apa pun jua tugas atau tanggungjawab yang diamanahkan, setiap warga Angkatan Tentera Malaysia perlu sentiasa

menonjolkan kelakuan organisasi yang positif yang seia sekata dengan Ikrar Kesateria dan Sumpah Perajurit yang dilafazkan.

KEEMPAT : KEPUASAN BERKHIDMAT

Angkatan Tentera Malaysia perlu menentukan agar setiap warganya mencapai kepuasan dalam perkhidmatan melalui peningkatan kualiti hidup mereka serta keluarga, memperkasakan diri melalui pembangunan siasah, membantu mereka mencapai aspirasi serta menyediakan hidup warga secara komprehensif untuk menyambung hidup sebagai orang awam setelah tamat perkhidmatan. Ke arah itu, kita hendaklah menitikberatkan penggembelangan polisi-polisi perkhidmatan yang sedia ada serta penglibatan kepimpinan yang efektif.

KELIMA : PERHUBUNGAN TENTERA - AWAM

Dari sudut peperangan moden, penerimaan oleh masyarakat adalah amat penting, yang antara lain mampu mengekalkan kesinambungan pelaksanaan operasi ketenteraan. Mengambil kira perubahan nilai yang meresapi masyarakat, usaha hendaklah diambil untuk menilai semula pendekatan awam dan tentera melalui pelbagai inisiatif yang relevan seperti kerjasama Tentera – Awam, hal-ehwal Tentera – Awam serta pengaplikasian operasi gerak saraf.

Saya meletakkan keyakinan yang tinggi bahawa dengan sokongan serta pergorbanan saudara dan saudari sekalian, Angkatan Tentera Malaysia akan berupaya untuk menempa kejayaan yang berterusan serta kekal relevan ke arah memartabatkan integriti pertahanan tanahair yang tercinta. Tindakan yang harus diambil adalah untuk terus membangunkan keupayaan, memperkasa imej serta meningkatkan keyakinan rakyat terhadap Angkatan Tentera Malaysia. Sehubungan itu, sentiasalah berusaha memberi khidmat terbaik dan meletakkan kepentingan perkhidmatan mengatasi segala-segalanya kerana kitalah PERISAI NEGARA yang menjadi harapan negara dan rakyat, dan kitalah pendokong utama tanahair yang tercinta demi masa hadapan pewaris kita.

sebagai Panglima Angkatan Tentera pertama dari Tentera Udara Diraja Malaysia pada 1 September 2009. Beliau yang telah berkhidmat di dalam ATM selama 41 tahun di mana mula menyertai TUDM pada 16 April 1970. Jeneral Tan Sri Azizan telah menamatkan latihan Pegawai Kadet di Maktab Tentera Diraja dengan jayanya dan seterusnya ditauliahkan sebagai Pilot Officer pada 16 April 1971 ke dalam Cawangan Kawalan Trafik Udara. Pada 15 April 1976, beliau telah mengikuti Kursus Asas Penerbangan di Australia dan menerima kelayakan untuk menjadi juruterbang TUDM apabila dianugerahkan Sayap Penerbangan pada 8 Julai 1977. Beliau telah menerbangkan pelbagai jenis pesawat TUDM seperti CT 4s, Aermacchi MB 326H, Bulldog B 100, Cessna 402B, BAe 125, Fokker 28, Pilatus PC 7, Falcon 900 dan C130.

Sepanjang kerjaya beliau, Jeneral Tan Sri Azizan telah diberikan kepercayaan untuk memegang pelbagai tugas penting di peringkat staf, pemerintah dan tiga perkhidmatan ATM. Beliau pernah menyandang tugas sebagai Ketua Skuadron VIP, pemeriksa, ketua dan jurulatih penerbangan di Pusat Latihan Penerbangan TUDM. Dalam masa yang sama, beliau juga merupakan salah seorang ahli Tim Penerbangan Akrobatik TUDM iaitu Tim Taming Sari. Jawatan penting lain yang pernah di sandang oleh Tan Sri ialah Penasihat Pertahanan di Islamabad, Pengarah Latih di Markas Tentera Udara dan Ketua Staf 2 Divisyen Udara.

Selain itu, beliau juga pernah menjawat jawatan Panglima 2 Divisyen Udara dan Komandan Kolej Tentera Udara. Sebelum dilantik mengetuai TUDM, beliau telah menjawat jawatan sebagai Panglima Operasi Udara dan kemudiannya sebagai Timbalan Panglima Tentera Udara mulai 5 April 2004. Kreadibili serta ciri-ciri kepimpinan yang dimiliki telah melayakkan beliau dilantik untuk menerajui TUDM sebagai Panglima Tentera Udara bermula 30 Oktober 2006. 1 September merupakan tarikh keramat dalam perkhidmatan beliau khususnya dan TUDM amnya apabila beliau dilantik secara rasminya sebagai Panglima Angkatan Tentera.

Jeneral Tan Sri Dato' Sri Azizan Ariffin TUDM telah mendirikan rumah tangga bersama Puan Sri Datin Sri Noorainee bte Abd Rahim dan dikurniakan lima orang cahayamata.

Biografi Jeneral Tan Sri Dato' Sri Zulkifeli bin Mohd Zin

Dilahirkan di Pasir Mas, Kelantan pada 14 Jun 1954, Jen Tan Sri Dato' Sri Zulkifeli bin Mohd Zin menamatkan Latihan Kadet di SANDHURST pada tahun 1974. Ditauliahkan sebagai Lt Muda di dalam Rejimen Ke-2 Askar

Melayu DiRaja selaku Ketua Platun pada 09 Ogos 1974. Beliau telah menjawat pelbagai jawatan di peringkat Batalion mulai daripada Ketua Platun hingga ke Pegawai Memerintah. Jeneral Tan Sri Dato' Sri Zulkifeli bin Mohd Zin telah menjawat beberapa jawatan staf di Markas Tentera Darat dan juga di Institusi Latihan termasuk Pegawai Staf di Markas Tentera Darat dan juga di Institusi Latihan termasuk Pegawai Staf Jurulatih Muslihat di Pusat Latihan Tentera Darat di Johor Bharu. Beliau pernah bertugas selaku Pengarah Infantri di Markas Tentera Darat pada 1999 hingga 2000. Beliau juga pernah menjawat jawatan juruarah di Maktab Turus Angkatan Tentera pada 1997.

Semasa berpangkat Kolonel beliau telah menjawat jawatan Komandan Pusat Latihan Tempur Tentera Darat (PULADA) dan Kol Sumber di MK TD. Jeneral Dato' Sri Zulkifeli bin Mohd Zin adalah lulusan dari Maktab Turus Angkatan Tentera (MTAT) dan Maktab Pertahanan Angkatan Tentera (MPAT). Dinaikkan ke Brigedier Jeneral pada tahun 2002 dan menjawat jawatan Asisten Panglima di Bahagian Perkhidmatan Simpanan (BPS). Beliau juga menjawat jawatan Panglima 8 Briged Infantri dari tahun 2003 hingga 2004 di Kelantan. Beliau telah dinaikkan ke Pangkat Mejar Jeneral dan seterusnya diberi kepercayaan oleh tampuk pemerintahan Angkatan Tentera Malaysia (ATM) untuk menerajui Misi Tim Pemantau Antarabangsa – Mindanao sebagai Komander Tim Pemantau pada 09 Oktober 2004 hingga 31 Ogos 2005.

Setelah selesai melaksanakan Misi Pemerhati selama lebih kurang setahun dan seterusnya menjawat jawatan Panglima Ke 3 Divisyen Infantri mulai 17 Oktober 2005 hingga 31 Jan 2007. Seterusnya beliau telah diberi kepercayaan oleh pucuk pimpinan Angkatan Tentera dan Negara dan dilantik menerajui Markas Medan Tentera Darat sebagai Panglima Medan Tentera Darat mulai 2 Jan 2007 hingga 1 Jun 2008. Sebagai seorang pemimpin yang berkaliber, beliau telah dilantik sebagai Timbalan Panglima Tentera Darat pada 2 Jun 2008 sehingga 20 Mei 2010 dan seterusnya menerajui Tentera Darat Malaysia sebagai Panglima Tentera Darat mulai 21 Mei 2010 sehingga 14 Jun 2011.

Atas keyakinan yang tinggi terhadap beliau, Jeneral Tan Sri Dato' Sri Zulkifeli bin Mohd Zin telah dilantik sebagai Panglima Angkatan Tentera Malaysia yang ke 18 mulai 15 Jun 2011.

Jeneral Tan Sri Dato' Sri Zulkifeli bin Mohd Zin telah berkahwin dengan Puan Sri Datin Sri Umi Kalsom binti Wan Awang dan dikurniakan dua orang anak perempuan. Hobi beliau adalah bermain golf dan membaca.



PERINTAH ULUNG PANGLIMA ANGKATAN TENTERA

بِسْمِ اللَّهِ الرَّحْمَنِ الرَّحِيمِ
السلام عليكم ورحمة الله وبركاته

Salam Sejahtera dan Salam 1Malaysia

Demi untuk menentukan kesejahteraan negara, Angkatan Tentera Malaysia akan tetap berdiri teguh di belakang Kerajaan. Kita akan terus bekerjasama dengan agensi-agensi Kerajaan yang lain dengan jitu dalam Pembangunan Negara Bangsa dan untuk menentukan keselamatan dan ketenteraman awam tetap terjamin. Seajar dengan itu, Angkatan Tentera Malaysia akan meneruskan rancangan untuk memperkasa pertahanan negara dengan giat serta mengukuhkan keupayaan atur gerak, versatil dan daya memusnah di samping mempertingkatkan keupayaan *Joint Situational Awareness*. Bagi memenuhi matlamat itu, semua Perkhidmatan hendaklah menentukan aset-asetnya sentiasa berada di tahap pengoperasian yang tinggi demi untuk menentukan kemantapan kesiagaan keupayaan tempur Angkatan kita.

Pertahanan dan keselamatan negara ini secara jelas bergantung kepada sebuah Angkatan Tentera yang kredibel, responsif, dinamik, mampu mengeksploit teknologi serta dianggotai oleh warga yang menikmati kepuasan untuk berkhidmat demi tanahair yang tercinta. Sehubungan itu, adalah amat penting untuk mencapai keseimbangan dalam elemen manusia, mesin dan kaedah bagi menentukan respons yang holistik, bersepadu serta berkesan. Justeru itu, demi untuk memastikan kepentingan agama, bangsa dan negara sebagai pegangan mutlak, maka kita akan memberi tumpuan ke atas aspek-aspek berikut:

PERTAMA : ANGKATAN SPEKTRUM PENUH.

Sesuai dengan peranannya di masa aman, peranan Angkatan Tentera Malaysia akan terus membantu Pihak Berkuasa Awam dalam menjayakan dasar-dasar Kerajaan. Oleh yang demikian, Angkatan Tentera Malaysia hendaklah berkemampuan untuk memberi respons dalam pelbagai bentuk persekitaran. Selari dengan itu, Angkatan Tentera Malaysia akan menentukan agar elemen-elemennya sentiasa berupaya menonjolkan kesan sinergi dalam memberi respons di darat, laut, udara dan juga ruang siber.

KEDUA : PENGLIBATAN KEPIMPINAN.

Penerapan aspek-aspek pemerintahan, kepimpinan serta pengurusan dalam setiap program yang melibatkan Angkatan Tentera Malaysia akan dapat menentukan pencapaian yang tinggi dan sistematik. Oleh itu, setiap peringkat pemerintahan hendaklah melaksanakan Penglibatan Kepimpinan atau *Participative Leadership* untuk menentukan semangat setiakawan yang sejati antara ketiga-tiga Perkhidmatan serta menjana sifat inovatif di kalangan warga mereka.

KETIGA : PENGUKUHAN KELAKUAN ORGANISASI ANGKATAN TENTERA.

Dalam ruang lingkup ketenteraan, kelakuan organisasi atau *organizational behaviour* didorongi oleh disiplin, tradisi, nilai serta etos yang diguna pakai oleh setiap warga tentera. Apa pun jua tugas atau tanggungjawab yang diamanahkan, setiap warga Angkatan Tentera Malaysia perlu sentiasa menonjolkan kelakuan organisasi yang positif yang seia sekata dengan Ikrar Kesateria dan Sumpah Perajurit yang dilafazkan.

KEEMPAT : KEPUASAN BERKHIDMAT.

Angkatan Tentera Malaysia perlu menentukan agar setiap warganya mencapai kepuasan dalam perkhidmatan melalui peningkatan kualiti hidup mereka serta keluarga, memperkasakan diri melalui pembangunan siasah, membantu mereka mencapai aspirasi serta menyediakan setiap warga secara komprehensif untuk menyambung hidup sebagai orang awam setelah tamat perkhidmatan. Ke arah itu, kita hendaklah menitikberatkan penggembelangan polisi-polisi perkhidmatan yang sedia ada serta penglibatan kepimpinan yang efektif.

KELIMA : PERHUBUNGAN TENTERA – AWAM.

Dari sudut peperangan moden, penerimaan oleh masyarakat adalah amat penting, yang antara lain mampu mengekalkan kesinambungan pelaksanaan operasi ketenteraan. Mengambil kira perubahan nilai yang meresapi masyarakat, usaha hendaklah diambil untuk menilai semula pendekatan awam dan tentera melalui pelbagai inisiatif yang relevan seperti kerjasama Tentera - Awam, hal-ehwal Tentera - Awam serta pengaplikasian operasi gerak saraf.

Saya meletakkan keyakinan yang tinggi bahawa dengan sokongan serta pengorbanan saudara dan saudari sekalian, Angkatan Tentera Malaysia akan berupaya untuk menempa kejayaan yang berterusan serta kekal relevan ke arah memartabatkan integriti pertahanan tanahair yang tercinta. Tindakan yang harus diambil adalah untuk terus membangunkan keupayaan, memperkasa imej serta meningkatkan keyakinan rakyat terhadap Angkatan Tentera Malaysia. Sehubungan itu, sentiasalah berusaha memberi khidmat terbaik dan meletakkan kepentingan perkhidmatan mengatasi segala-segalanya kerana kitalah PERISAI NEGARA yang menjadi harapan negara dan rakyat, dan kitalah pendokong utama tanahair yang tercinta demi masa hadapan pewaris kita.

وبالله التوفيق والهداية والسلام عليكم ورحمة الله وبركاته

"SENTIASA BERSEPADU"

JENERAL TAN SRI DATO' SRI ZULKIFELI BIN MOHD ZIN
PANGLIMA ANGKATAN TENTERA

17 Jun 2011





MAJLIS PELANGKARAN KOMI'ENI ASHAB WATANIAH KAWAGAH
SETIAWANGSA, BATU, BUNIT, BINTANG, LEMBAH PANTOL
SEPUTIH DAN CHERAS
OLEH
YANG BERSAPAKA
SEN DATUK NG ZULAPRI DIN DAN CAPAL ABDIN
PANGKAL TENTERA TAWAU
10 AGUST 2011

ISSN 1511-1849
9 771511 184008

UNIT KOMUNIKASI KORPORAT